




宮闈典第十七卷

皇太后部彙考三

北齊

北齊定尊皇太后如冊皇后之禮 按隋書禮儀志後齊將崇皇太后則太尉以玉帛告圓丘方澤以幣告廟皇帝乃臨軒命太保持節太尉副之設九嬪命使者受璽綬冊及節詣西上閤其日昭陽殿文物具陳臨軒詔使者就位持節及璽綬稱詔二侍中拜進受節及冊璽綬以付小黃門黃門以詣閤皇太后服褱衣處昭陽殿公主及命婦陪列於殿皆拜小黃門以節綬入女侍中受以進皇太后皇太后興受以授左右復坐反節於使者使者受節出冊皇后如太后之禮

文宣帝天保元年夏五月戊午卽皇帝位辛酉尊王太后爲皇太后 按北齊書文宣帝本紀云云按神武明皇后傳后婁氏諱昭君贈司徒內干之女也少明悟強族多聘之並不肯行及見神武於城上執役驚曰此真吾夫也乃使婢通意又數致私財使以聘已父母不得已而許焉拜渤海王妃文襄嗣位進爲太妃文宣將受魏禪后固執不許帝所以中止天保初尊爲皇太后宮曰宣訓

天保十年十一月癸卯太子卽皇帝位庚戌尊李皇后爲皇太后 按北齊書文宣帝本紀云云
按文宣皇后傳后李氏諱祖娥趙郡李希宗女也初爲太原公夫人帝建中宮而立后焉天保十年
改爲可賀敦皇后

孝昭帝皇建元年八月壬午皇帝卽位於宣德殿詔皇太后李氏稱文宣皇后宮曰昭信 按北齊
書孝昭帝本紀云云 按文宣皇后傳孝昭卽位降居昭信宮號昭信皇后

後主天統四年十二月戊寅尊太上皇后爲皇太后 按北齊書後主本紀云云 按武成皇后傳
后胡氏安定胡延之女天保初選爲長廣王妃產後主武成崩尊爲皇太后陸媼及和士開密謀殺
趙郡王叡出婁定遠高文遙爲刺史和陸譖事太后無所不至初武成時后與諸閹人囊狎武成寵
幸和士開每與后握槩因此與后姦通武成崩後數出詣佛寺又與沙門曇獻通布金錢於獻席下
又挂寶裝牙牀於獻屋壁武成平生之所御也乃置百僧於內殿託以聽講日夜與曇獻寢處以獻
爲昭元統僧徒遙指太后以弄曇獻乃至謂之爲太上者帝聞太后不謹而未之信後朝太后見二
少尼悅而召之乃男子也於是曇獻事亦發皆伏法并殺元山王三郡君皆太后之所昵也帝自晉

陽奉太后還鄴至紫陌卒遇大風舍人魏僧伽明風角奏言卽時當有暴逆事帝詐云鄴中有急轡弓纏稍馳入南城令鄧長顥幽太后北宮仍有敕內外諸親一不得與太后相見久之帝復迎太后太后初聞使者至大驚慮有不測每太后設食帝亦不敢嘗周使元偉來聘作述行賦敘鄭莊公克段而遷姜氏文雖不工當時深以爲愧齊亡入周恣行姦穢隋開皇中殂

武平七年送皇太后胡氏於北朔州與羣臣畫禦周之策 按北齊書後主本紀武平七年十二月乙卯帝密遣王康德與中人齊紹等送皇太后皇太子於北朔州甲子皇太后從北道至引文武一品以上入朱華門賜酒食給紙筆問以禦周之方羣臣各異議帝莫知所從

北周

武帝天和二年六月辛亥尊所生叱奴氏爲皇太后 按周書武帝本紀云云 按文帝叱奴皇后傳后代人也太祖爲丞相納后爲姬生高祖天和二年六月尊爲皇太后

建德三年皇太后崩帝終三年之喪 按周書武帝本紀建德三年春二月庚申皇太后不豫三月辛酉至自雲陽宮癸酉皇太后叱奴氏崩帝居倚廬朝夕僅一溢米羣臣表請累旬乃止詔皇太子

贊總釐庶政夏四月乙卯齊遣使弔贈會葬五月庚申葬文宣皇后於永固陵帝祖跣至陵所辛酉詔曰齊斬之情經籍彝訓近代沿革遂亡斯禮伏奉遺命既葬便除攀慕几筵情實未忍三年之喪達於天子古今無易之道王者之所常行但時有未諧不得全制軍國務重庶自聽朝縗麻之節苦廬之禮率遵前典以申罔極百寮以下宜依遺命公卿上表固請俯就權制過葬卽吉帝不許引古禮答之羣臣乃止於是遂申三年之制五服之內亦令依禮

宣政元年宣帝卽位尊皇后阿史那氏爲皇太后生母李氏爲帝太后 按周書宣帝本紀宣政元年六月戊戌皇太子卽皇帝位尊皇后爲皇太后秋七月癸亥尊所生李氏爲帝太后 按武帝阿史那皇后傳后突厥木杆可汗俟斤之女俟斤初欲以女配帝旣而悔之高祖卽位前後累遣使要結乃許歸后於我保定五年二月詔陳國公純許國公宇文貴神武公竇毅南陽公楊荐等奉備皇后文物及行殿并六宮以下百二十人至俟斤牙帳所迎后天和三年三月后至高祖行親迎之禮宣帝卽位尊爲皇太后 按武帝李皇后傳后名娥姿楚人也于謹平江陵后家被籍沒至長安太祖以后賜高祖後稍得親幸

宣帝大象元年帝自稱天元皇帝尊皇太后阿史那氏爲天元皇太后李氏爲天皇太后 按周書
宣帝本紀大象元年帝自稱天元皇帝所居稱天臺冕有二十四旒室服旗鼓皆以二十四爲節皆
準天臺尊皇太后爲天元皇太后秋七月丙申尊天元帝太后李氏爲天皇太后壬子改天元帝后
朱氏爲天皇后立妃元氏爲天右皇后妃陳氏爲天左皇后

大象二年尊天元皇太后阿史那氏爲天元上皇太后天皇太后李氏曰天元聖皇太后 按周書

宣帝本紀大象二年春二月壬午尊天元皇太后爲天元上皇太后天皇太后李氏曰天元聖皇太
后癸未立天元皇后楊氏爲天元太皇天后天皇后朱氏天大皇后天右皇后元氏爲天右大皇后天
左皇后陳氏爲天左大皇后正陽宮皇后直稱皇后 按阿史那皇后傳大象二年又尊爲天元上

皇太后冊曰天元皇帝臣贊奉璽綬冊謹上天元皇太后尊號曰天元上皇太后伏惟窮神盡智含
弘載物道洽萬邦儀刑四海聖慈訓誘恩深明德雖冊徽號未極尊嚴是用增奉鴻名光緝常禮俾
誠敬有展歡慰在茲福祉無疆億兆斯賴 按李皇后傳大象二年尊爲天元聖皇太后冊曰天元
皇帝臣贊奉璽綬冊謹上天皇太后尊號曰天元聖皇太后伏惟月精效祉坤靈表貺瑞肇丹陵慶

流華渚雖率由令典夙奉徽號而因心盡敬未極尊名是用思弘稱首上昭聖德敢竭誠敬永綏福履顯揚慈訓貽厥孫謀

隋

隋定皇太后輿服印璽之制 按隋書禮儀志皇太后乘重翟車青質金飾諸末朱輪金根朱牙其

箱飾以重翟羽青油纁朱裏通幃繡紫帷朱絲絡網繡紫絡帶八鑾在衡錫鑿纓十二就金髮方鉉

插翟尾朱總

總以朱爲之如馬纓而小著馬勒在兩耳兩鑣也

駕蒼龍受冊從郊禘享願則供之皇太后服同於后服而貴

妃以下並亦給印皇太后璽以白玉爲之方一寸二分螭獸鈕文各如其號璽不行用有令則太后

以宮名衛尉印

唐

唐定皇太后金璽及出入儀衛之制 按唐書車服志皇太后璽以金爲之藏而不用封令書以宮

官印 按儀衛志皇太后出尚儀版奏請中嚴尚服率司仗布侍衛司賓列內命婦於庭西嚮北上

六尚以下詣室奉迎尚服負寶內僕進車於閤外尚儀版奏外辦馭者執轡皇太后乘輿以出華蓋

侍衛警蹕內命婦從出門皇太后升車從官皆乘馬內命婦宮人以次從清游隊旗一執者一人佩橫刀引夾皆二人佩弓箭橫刀騎次金吾衛折衝都尉一人佩橫刀弓箭領騎四十亦佩橫刀夾折衝執稍二十人持弩四人佩弓箭十六人持纓稍刀二人次虞候攸飛二十八人騎佩弓箭橫刀夾道分左右以屬黃麾仗次內僕令一人在左丞二人在右各書令史二人騎從次黃麾一執者一人夾道二人皆騎次左右廂黃麾仗廂皆三行行百人第一矩戟五色麾執者黃地白花綦襖冒第二戈五色麾執者赤地黃花綦襖冒第三鐙五色麾執者青地赤花綦襖冒左右衛左右威衛左右武衛左右驍衛左右領軍衛各三行行二十人每衛以主帥六人主之皆豹文袍冒執鎗石裝長刀騎唯左右領軍衛減三人每衛果毅都尉一人披繡袍各一人從左右領軍衛有絳引旛引前者三掩後者三次內謁者監四人給事二人內常侍二人內侍少監二人騎分左右皆有內給使一人從次內給使百二十人平巾幘大口縵緋襦襪分左右屬於宮人車次偏扇團扇方扇皆二十四宮人執之衣綵大襖裙襦綵衣革帶履分左右次香燈一內給使四人舉之居重翟車前次重翟車駕四馬駕士二十四人次行障六次坐障三皆左右夾車宮人執之服同執扇次內侍伯二人領寺人六人

執御刀服如內給使夾重翟車次腰舉一執者八人團扇尾扇二夾舉次大繖四次雉尾扇八左右橫行爲二重次錦花蓋二單行次小雉尾扇朱畫團扇皆十二橫行次錦曲蓋二十橫行爲二重次錦六柱八分左右自腰舉以下皆內給使執之次宮人車次絳麾二分左右次後黃麾一執者一人夾二人皆騎次供奉宮人在黃麾後次厭翟車翟車安車皆駕四馬駕士各二十四人四望車駕士二十二入金根車駕牛駕士十二人次左右廂衙門各二每門二人執四人夾皆赤綦襖黃袍冒騎次左右領軍衛廂皆一百五十人執受赤地黃花綦襖冒前屬於黃麾仗後盡鹵簿廂各主帥四人主之皆黃袍冒執鎗石裝長刀騎折衝都尉二人檢校受仗皆一人騎從次衙門一盡鹵簿後受仗內正道每門監門校尉二人主之執銀裝長刀廂各有校尉一人騎佩銀橫刀往來檢校御馬減大駕之半皇太后將還三嚴內典引引外命婦出次就位司賓引內命婦出次序立大次之前旣外辦馭者執轡皇太后乘輿出次華蓋警蹕侍衛如初內命婦以下乘車以從車駕入內典引引外命婦退駕至正殿門外車駕南嚮尙儀前奏請降車將士還

高宗弘道元年中宗卽位尊天后武氏爲皇太后臨朝稱制 按唐書武后本紀則天順聖皇后武

氏諱璽并州文水人也父士驥官至工部尙書荊州都督封應國公后年十四太宗聞其有色選爲才人太宗崩后削髮爲比丘尼居於感業寺高宗幸感業寺見而悅之復召入宮久之立爲昭儀進號宸妃永徽六年高宗廢皇后王氏立宸妃爲皇后高宗自顯慶後多苦風疾百司奏事時時令后決之常稱旨由是參豫國政后既專寵與政乃數上書言天下利害務收人心而高宗春秋高苦疾后益用事遂不能制高宗悔陰欲廢之而謀洩不果上元元年高宗號天皇皇后亦號天后天下之人謂之二聖弘道元年十二月高宗崩遺詔皇太子卽皇帝位軍國大務不決者兼取天后進止甲子皇太子卽位尊后爲皇太后臨朝稱制

睿宗景雲元年韋后矯詔自立爲皇太后臨朝攝政尋誅廢爲庶人 按唐書睿宗本紀景雲元年六月壬午韋皇后弑中宗矯詔立溫王重茂爲皇太子發諸府兵五萬屯京師以韋溫總知內外兵馬甲申乃發喪又矯遺詔自立爲皇太后皇太子卽皇帝位以睿宗參謀政事大赦改元曰唐隆太后臨朝攝政罷睿宗參謀政事以爲太尉庚子臨淄郡王隆基率萬騎兵入北軍討亂誅韋氏七月乙亥追廢皇后韋氏爲庶人 按中宗韋庶人傳韋氏京兆萬年人被選爲妃嗣聖初立爲皇后俄

與帝處房陵及帝復卽位羣臣上后號爲順天皇后三年帝親郊引后亞獻明年正月望夜帝與后微服過市彷徨觀覽縱宮女出游皆淫奔不還國子祭酒葉靜能善禁架常侍馬秦客高醫光祿少卿楊均善烹調皆引入後庭均秦客悉於后嘗喪免不歷旬輒起帝遇弑議者謹咎秦客及安樂公主后大懼引所親議計乃以刑部尙書裴談工部尙書張錫輔政留守東都詔將軍趙承福薛簡以兵五百衛譙王重福與兄溫定策立溫王重茂爲皇太子列府兵五萬分二營屯京師然後發喪太子卽位是爲殤帝皇太后臨朝溫總內外兵檢護宮省族弟濯播宗子捷璿璿甥高崇及武延秀分領左右屯營羽林飛騎萬騎京師大恐傳言且革命播璿入軍中鞭督萬騎欲立威士怨不爲用俄而臨淄王引兵夜拔元武門入羽林殺璿播崇於寢斧關叩太極殿后遁入飛騎營爲亂兵所殺斬延秀安樂公主分捕諸韋諸武與其支黨悉誅之皇后及安樂首東市翌日追貶爲庶人葬以一品禮

德宗建中元年遙尊母沈氏爲皇太后詔睦王述爲奉迎使分遣諸沈巡行州縣物色咨訪按唐書德宗本紀德宗神武聖文皇帝諱迥代宗長子也母曰睿眞皇太后沈氏初沈氏以開元末選入

代宗宮安祿山之亂元宗避賊於蜀諸王妃妾不及從者皆爲賊所得拘之東都之掖廷代宗克東都得沈氏留之宮中史思明再陷東都遂失所在代宗大曆十四年五月辛酉崩癸亥德宗卽皇帝位建中元年八月丁巳遙尊母沈氏爲皇太后九月庚寅睦王述爲奉迎皇太后使按代宗睿眞皇后傳后沈氏吳興人開元末以良家子入東宮太子以賜廣平王實生德宗天寶亂賊囚后東都掖庭王入洛復留宮中時方北討未及歸長安而河南爲史思明所沒遂失后所在代宗立以德宗爲皇太子詔訪后在亡不能得德宗卽位乃先下詔贈后曾祖士衡太保祖介福太傅父易直太師弟易良司空易直子震太尉一日封拜百二十七人詔制皆錦翠地飾以廐馬負載賜其家易良妻崔入謁帝易服召王韋美人出拜詔崔勿答建中元年乃具冊前上皇太后尊號帝供張含元殿具寶冕出自左序立東方羣臣在位帝再拜奉冊歔歔感咽左右皆泣於是中書舍人高參上議漢文帝卽位遣薄昭迎太后於代今宜用漢故事令有司擇日分遣諸沈行州縣物色咨訪以述宣皇帝孝思意冀上天降休靈命允答須審知皇太后行在然後遣大臣備法駕奉迎帝乃以睦王述爲奉迎使工部尙書喬琳副之昇平公主侍起居使者分行天下故中官高力士女頗能言禁中事與女

古今圖書集成
官李真一嘗從后遊李見高疑問之含糊不堅而年狀差似后又后嘗削脯哺帝傷左指高亦嘗剖瓜傷指是時宮中無識后者於是迎還上陽宮馳以聞帝喜羣臣皆賀力士子知非是具言其情詔貸之帝謂左右吾寧受百罔冀得一真於是自謂太后者數矣及索驗左皆辭窮終帝世無聞焉貞元七年詔贈外高祖琳爲司徒封徐國公爲立五廟以琳爲始祖詔族子房爲金吾將軍奉其祀憲宗元和元年五月辛卯尊母王氏爲皇太后 按唐書憲宗本紀云云 按順宗莊獻皇后傳后王氏琅邪人代宗時后以良家選入宮爲才人順宗在藩帝以才人幼故賜之爲王孺人是生憲宗王在東宮冊爲良娣順宗卽位將立后会病棘而止憲宗內禪尊爲太上皇后元和元年上尊號曰皇太后后謹畏深抑外家無毫絲假貸訓厲內職有古后妃風

元和十一年三月庚午皇太后崩 按唐書憲宗本紀云云 按順宗莊憲皇后傳后崩年五十四遺令曰皇太后敬問具位萬物之理必歸於有極未亡人嬰霜露疾日以衰頓幸終天年得奉陵寢志願獲矣其何所哀易月之典古今所共皇帝宜三日聽政服二十七日釋天下吏民令到臨三日止宮中非朝暮臨無輒哭無禁婚嫁祠祀飲食酒肉已釋服聽舉樂侍醫無加罪陪祀如舊制有司

上諡葬豐陵

元和十五年閏月丙午皇太子卽皇帝位於太極殿乙卯尊母爲皇太后 按唐書穆宗本紀云云

按憲宗懿安皇后傳后郭氏汾陽王子儀之孫父曖尙昇平公主實生后憲宗爲廣陵王聘以爲妃生穆宗穆宗嗣位上尊號皇太后贈曖太尉母齊國大長公主擢兄釗刑部尙書鑑金吾大將軍后移御興慶宮凡朔望三朝帝率百官詣宮門爲壽或歲時慶問宴饗後宮戚里內外婦車騎駢壅環珮之聲滿宮帝亦豪矜朝夕供御務華衍侈大稱后意

穆宗長慶二年十一月庚午皇太后幸華清宮癸酉迎皇太后遂獵於驪山 按唐書穆宗本紀云

云 按憲宗懿安皇后傳后嘗幸驪山登覽徘徊詔景王督禁甲從帝自到昭應奉迎留帳飲數日還帝崩中人有爲后謀稱制者后曰吾效武氏耶今太子雖幼尙可選重德爲輔吾何與外事哉

長慶四年正月丙子皇太子卽皇帝位二月癸未尊母爲皇太后 按唐書敬宗本紀云云 按穆

宗恭僖皇后傳后王氏越州人本仕家子幼得侍帝東宮生敬宗長慶時冊爲妃敬宗立上尊號爲皇太后贈后父紹卿司空母張追封趙國夫人文宗時稱寶曆太后太和五年宰相建白以太皇太

后與寶曆太后稱號未辨前代詔令不敢斥言皆以宮爲稱今寶曆太后居義安殿宜曰義安太后詔可會昌五年崩上諡葬光陵

敬宗寶曆二年江王卽皇帝位於宣政殿戊申始聽政尊母爲皇太后 按唐書文宗本紀云云按穆宗貞獻皇后傳后蕭氏閩人也穆宗爲建安王后得侍生文宗文宗立上尊號曰皇太后初后去家入長安不復知家存亡惟記有弟帝爲訪之俄有男子蕭洪因后娣壻呂璋白見之太后謂得真弟悲不自勝帝拜洪金吾將軍出爲河陽三城節度使稍徙鄜坊始節度自神策出者舉軍爲辦裝因三倍取償洪所代未及償而死軍中併責償於洪洪不許左軍中尉仇士良憾之會閩有男子蕭本又稱太后弟士良以聞自鄜坊召洪下獄按治乃代人詔流驩州不半道賜死擢本贊善大夫寵贈三世帝以爲真不淹旬賜累鉅萬然太后真弟庸輒莫能自達本給得其家系士良主之遂聽不疑歷衛尉卿金吾將軍會福建觀察使唐扶上言泉州男子蕭弘自言太后弟御史臺參治非是昭義劉從諫又爲言請與本辯有詔三司高元裕孫簡崔郇雜問乃皆妄本流愛州弘儋州初太和中懿安太后居興慶宮寶曆太后居慶安宮后居大內號三宮太后帝每五日問安及歲時慶謁率

由複道至南內羣臣及命婦詣宮門候起居有司獻四時新物送三宮亦稱賜帝曰上三宮何可言賜遽索筆滅賜爲奉正月望夜帝御咸泰殿大然燈作樂迎三宮太后奉觴進壽禮如家人諸王公主皆得侍武宗時徙積慶殿又號積慶太后大中元年崩上今諡

武宗會昌六年宣宗以皇太叔卽皇帝位尊所生母鄭氏爲皇太后 按唐書宣宗本紀會昌六年

武宗疾大漸左神策軍護軍中尉馬元贇立光王爲皇太叔三月甲子卽皇帝位於柩前四月乙亥始聽政尊母爲皇太后 按憲宗孝明皇后傳后鄭氏丹陽人或言本爾朱氏元和初李錡反有相者言后當生天子錡聞納爲侍人錡誅沒入掖廷侍懿安后憲宗幸之生宣宗宣宗爲光王后爲王太妃及卽位尊爲皇太后太后不肯別處故帝奉養大明宮朝夕躬省候焉

昭宗天祐元年八月丙午哀帝卽位九月庚午尊皇后爲皇太后 按唐書哀帝本紀云云 按昭宗皇后傳后何氏梓州人系族不顯帝爲壽王后得侍婉麗多智恩答甚厚旣卽位號淑妃從狩華州詔冊爲皇后光化三年帝獵夜歸后遣德王還邸遇劉季述留王紫庭院明日季述等挾王陳兵詔百官脅帝內禪后恐賊臣加害天子卽取璽授季述與帝同幽東宮賊平反正天復中從帝駐鳳

翔帝奔播既屢威柄盡喪已而遇弑哀帝卽位尊爲皇太后徙居積善宮號積善太后帝將禪天下后亦遇害初蔣元暉爲全忠邀九錫入喻后度不免見元暉垂泣祈哀以母子託命宣徽使趙殷衡譖於全忠曰元暉等銘石像座積善宮將復唐全忠怒遂遣縊后以醜名加之廢爲庶人

後唐

莊宗同光元年冊尊所生母曹氏爲皇太后以嫡母劉氏爲皇太妃 按五代史唐莊宗本紀不載按唐太祖家人傳太祖夫人劉氏無子性賢不妬忌常與太祖言曹氏相當生貴子宜善待之而曹氏亦自謙退因相得甚歡曹氏封晉國夫人後生子是謂莊宗太祖奇之曹氏由是專寵太祖性暴怒多殺人左右無敢言者惟曹氏從容諫譬往往見聽及莊宗立事曹氏尤謹其救趙破燕取魏博與梁戰河上十餘歲嘗馳歸省其母至三四人皆稱其孝莊宗卽位冊尊曹氏爲皇太后而以嫡母劉氏爲皇太妃太妃往謝太后太后有慚色太妃曰願吾兒享國無窮使吾獲沒於地以從先君幸矣復何言哉

同光三年五月丁酉皇太妃薨廢朝五日秋七月壬寅皇太后崩

注

太祖正室於莊宗爲嫡母書太